

Uunga siunnersuut:

**Avanersuarimi inuussutissarsiutinik inerisaanissamut siunertalimmik
periusissiorinissamut, ilaatigut qaammarsaassutinik pikkorissaanernillu imaqartussamik
UKA2026-mut suliaqaqqullugit, Naalakkersuisut peqquneqarnissaannik Inatsisartut
aalajangiiffisassaattut siunnersuut**

Lars Poulsenimit siunnersuutigineqartoq

pillugu

Inuussutissarsiornermut Aatsitassanullu Ataatsimiititaliap**siunnersuutip aappassaaneerneqarneranut****ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Mariane P. Jensen, Inuit Ataqatigiit, siulittaasoq
Inatsisartunut ilaasortaq Juno Berthelsen, Naleraq, siulittaasup tullia
Inatsisartunut ilaasortaq Hans-Erik Enoksen, Demokratit
Inatsisartunut ilaasortaq Lars Poulsen, Siumut
Inatsisartunut ilaasortaq Knud Kleemann, Atassut

UKA2025-mi ulloq 9. oktober siullermeerinninnerup kingorna ataatsimiititaliap siunnersuut misissuataarpaa.

Siunnersuutip imarisaa siunertaalu

Avanersuarimi inuussutissarsiutinik inerisaanissamut siunertalimmik, inuussutissarsiorinikkut aallartisarneq, namminersortutut ingerlatsinissamut pitsaanerpaamik atugassaritinneqartunut sinaakkutit pillugit, Naalakkersuisut periusissiorinissamut peqquneqarnissaat siunnersuutip siunertaraa. Matumani kommuni sumiiffimmilu ingerlatsisut qanimut suleqatigalugit pilersaarusiortuni ingerlatsineq, siunnersuinerit, piginnaasanik ineriartortitsineq kiisalu mikrolaanitut ittunik aningaasalersuinikkut tapersersuisoqarnissaa.

Siunnersuutip Inatsisartunit siullermeerneqarnera

Siullermeerinninnermi suliniutinik nutaanik aallartitsinnani inuussutissarsiutinik siuarsaaneq pillugu nuna tamakkerlugu periusissiassap naammassineqarnissaa, atuutsilersinneqarnissaalu

pingaarnersiorneqaruni naleqqunnerpaassasoq Naalakkersuisunit itigartitsissutigineqartussatut inassuteqarnerminni tunngavilersuutigaa.

Itigartitsissuteqarneq Demokraatinit tapersersorneqartoq, taamaattoq Inuit Ataqatigiit Siumullu immikkoortup ataatsimiititaliami suliarineqarnissaa innersuussutigaa.

Naaleraq allannguutissatut siunnersuuteqarpoq:

"Nuna tamakkerlugu inuussutissarsiutinik inerisaanissamut siunertalimmik periusissiorneqarnissamut, imaqartussamik UKA2026-mut Naalakkersuisut suliaqqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut."

Naalakkersuisut allannguutissatut siunnersuutaat

Siullermeerinninnermi allannguummik siunnersuuteqarnissaq pisariaqalersoq ersarissimmat Naalakkersuisut nutaamik takorluukkatik pillugit Inuussutissarsiornermut, Aatsitassanut, Nukissiuutitut, Inatsisinut Atuutsitsinermit Naligiissitaanermullu Naalakkersuisoq Naaja H. Nathanielsenin Naalakkersuisunut allakkatigut saaffiginnissuteqarpoq. Taamaalillutillu Naalakkersuisut ataani allassimasutut allannguutissamik siunnersuuteqarlutik:

"Isorliunerusut, nunalu tamakkerlugu aallarnisaanermik, inuussutissarsiutinillu siuarsaanermik suliaqarnissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanna aallarnisaaneq, inuussutissarsiutinillu siuarsaaneq pillugit nuna tamakkerlugu periusissiassami pingaartitatut, immikkut imikkoortutut ilaatinneqassaaq".

Siunnersuutip aningaasatigut kingunerisassai

Siunnersuutip piviusunngortinneqarneratigut aningaasatigut kingunerisassai AC-fuldmægtigip ukiumut akissarsiaasa 500.000 koruuniusut nalinganut missiliorneqartoq ataatsimiititaliamit maluginiarneqarpoq.

Ataatsimiititaliap siunnersuummut oqaaseqaatai

Periusissiassap naammassineqarnissaanut, atuutsilersinneqarnissaanullu suliaqarnermi kommunit, inuussutissarsiutillit, Inatsisartullu oqaloqatiginerisa nanginneqarnissaannut Naalakkersuisut immikkoortoq 106-imi allassimasut qilanarigaat ataatsimiititaliap naammagisimaarinnilluni maluginiarpaa.

Taamalilluni aallarnisaaneq pillugu Qaqortumi, Nuummi, Aasianni, Ilulissanilu tallimanik worksopertitserernerup kingorna, periusissiassamut toqqartuilluni ilanngunneqartussanik siunnersuutitsialannik, massakkullu unamminartunik allattuisoqartoq ataatsimiititaliap iluaralugu isiginiarpaa.

Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqtigiiinneersut, Demokraatineersut, Siumumeersut Atassummeersullu allannguutissatut siunnersuut imaattoq saqqummiukkumavaat:

- *Isorliunerusut ilaanni ineriartortitsiffiunngitsuni aallarnisaanermik inuussutissarsiutinillu ineriartortitsinermik aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatumani Qaanaaq, Ittoqqortoormiit, Nanortalik, Narsaq aamma Paamiut immikkut ilaatinneqassapput, nunalli immikkoortuini tamani pisariaqartitsineq aalajangersimasumik nalilerneqassaaq. Tamanna aallarnisaaneq inuussutissarsiutinillu siuarsaaneq pillugit nuna tamakkerlugu periusissiassami UKA2026-mi saqqummiunneqartussami pingaarnertut sammineqartussatut immikkut ilaatinneqassaaq.*

Ataatsimiititaliami ikinnerussuteqartut Naleqqameersut allannguutissatut siunnersuut imaattoq saqqummiukkumavaat:

- *Isorliunerusut ilaanni ineriartortitsiffiunngitsuni aallarnisaanermik inuussutissarsiutinillu ineriartortitsinermik aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatumani Qaanaaq, Ittoqqortoormiit, Tasiilaq, Upernavik, Nanortalik, Narsaq, Paamiut aammalu sinerissami nunaqarfiit immikkut ilaatinneqassapput. Tamanna aallarnisaaneq inuussutissarsiutinillu siuarsaaneq pillugit nuna tamakkerlugu periusissiassami UKA2026-mi saqqummiunneqartussami pingaarnertut sammineqartussatut immikkut ilaatinneqassaaq.*

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Mariane P. Jensen
Siulittaasoq

Juno Berthelsen
Siulittaasup tullia

Hans-Erik Enoksen

Lars Poulsen

Knud Kleemann